

**F.I. FRONTO
CANONICUS
REGULARIS ET
CANCELLARIUS S.
GENOUEFAE AC...**

Jean Fronteau, Josè Maria
Fonseca de Evora



cum infamia proſcribi non patiaris modò, ſed vltro conſentias & proſcriptionem iſtam tuo calculo confirmes. Poſtremo, quod, vt audio, à multis iactatur, quæſtionem Facti cum quæſtione Iuris in illa Formulâ Episcoporum confundi ægre fers, atque eò nos adigi, vt rei illi quæ merum Factum continet, eadem manu eademque fide ſuffragemur, quæ circa ſola Eccleſiæ dogmata adhiberi ſolet: quod tamen, ais, in Eccleſia inauditum & nuſquam hætenus vſurpatum. Hæc ſunt igitur quæ te mouent, vt ab omni Subſcriptione abſtineas, & eam à te exigentibus relucteris, quaquâ illi ſint autoritate.

Tria hæc velim mecum examines. Nihil quicquam dicturus ſum, quod non diligenter apud me, & coram Deo agita-uerim, non ab eo modò tempore quo Benaij in territorio Andegauenſi Priorem, Paſtoremque ago, ſed longè antequam ab Vrbe diſceſſiſſem: vt multi viri cum Religioſiſſimi, rum ſpectatiſſimi teſtari poſſunt.

Ais itaque te nolle cum manifeſtæ veritatis detrimento huic Formulæ Episcoporum ſubſcribere. Quæſo an veritas illa tuo tibi teſtimonio conſtat, id eſt an tute Librum Ianſenij legeris accuratè, tuoque iudicio vſus deprehenderis Ianſenium nullo modo eſſe authorem harum quinque Pro- poſitionum? an vero aliorum diligentia & induſtriâ id tibi manifeſtum factum fuerit? ſi tuo id labore compertum habes, fateberis non niſi iteratâ Libri lectione & frequenti locorum inſpectione, ac collatione id te conſecutum; multa animaduerſione opus fuiſſe; acre iudicium, nec vulgare ſtudium ad id requiri: atque adeo non ita manifeſta veritas eſt, ſicut lux iſta quâ fruimur, aut ea quæ ex primis principiis, vt loquuntur philoſophi, ſtatim eliciuntur; ſed veritas illa abſcondita eſt, inuoluta, ingentis voluminis mole oppreſſa. Atqui in indagatione eiſmodi veritatum, hoc eſt latentium, primosque aſpectus fugientium falli nos poſſe niſi perſuaſum habemus, plus nimio ſapimus, & iam ex hoc erramus. Cum ergo Summus Pontifex aſſeueret ſtudio, & cura Theologorum Romanorum rem hanc diu exagitatam fuiſſe: cum Episcopi Galliæ huic etiam rei operam nauauerint, inter-

quos quis neget esse viros doctissimos & diligentissimos? & contrarium affirmant eius quod sentis, cur iudicio tuo potius quàm iudicio tantorum Theologorum? Et quomodo tibi manifesta veritas est, quam alij minimè vident, nec credere possunt, quidquid scripserint multi ut ei lucem facerent?

Sed ais tuo te iudicio hac in re usum non fuisse, sed iudicio aliorum æque doctissimorum, meoque cum primis, licet nullâ doctrinæ prærogatiuâ spectabilis sim. Bene est, videri quid reponam, & nisi me indignum censes, quem authorem habeas; sequere me. Re verâ bis Iansenij Librum sumpsi in manus, ut quæstionem hanc ad examen reuocarem. Re diligenter pensitatâ existimaui tum primùm Iansenium posse ab omni calumnia vindicari; iis in locis, è quibus has excerpere propositiones videntur, vidi quædam passim inseri temperamenta, quibus ea quæ durius pronuntiavit, emolliri & corrigi possent. Hoc inquam aliquandiu existimaui: non sic tamen ut mihi manifesta veritas esset; neque falli posse non dubitabam. Nemo quippe aderat, qui contradiceret. Facile fuit ut mihi ipsi imponerem & præiudiciis occupatus in hanc potius quam in aliam partem inclinarem; denique non ita oculatus sum, ut omnia videam. Dum sic anceps nutat animus S. P. N. ALEXANDER VII. statuit nemini licere has quinque Propositiones Iansenio abiudicare, quod reuerâ Iansenij sint, & in sensu Ianseniano damnatæ. Illico ut hanc Constitutionem vidi, non dubitavi Ecclesiæ Capiti & Pastori esse assentiendum. Cumque Formula Episcoporum id exigat, ut hunc meum assensum manu meâ consignem, libenter obtempero. Quid in hoc negotio inuenitur quod argui possit? Meam sententiam nolo cuiusquam sententiæ præferri. Hoc non ex ignavia, aut imbecillitate, sed ex Christianâ moderatione profisciscitur. Huic meæ sententiæ renuntio, ut Ecclesiæ Patribus morem geram. hoc non modò pium, sed etiam æquum est. Qui secus faxit, is præfractus, & pertinax, & genio suo nimium indulgens censendus. Huius iraque capitis summa hæc est, vbi manifesta veritas non est, aliorum iudicio & inquisitioni cedere laude

dignum est : maximè si illi quorum iudicio stamus, nobis prælati sunt à Deo dari, vt eos audiamus : atqui hîc manifesta veritas non est ; quia à multis non deprehenditur, nec agnoscitur, & multiplici ac varia inquisitione indiget. Igitur qui aliorum sententiam potius quàm suam amplectitur, nihil contra manifestam veritatem aggreditur. Et hoc est primum, quod te mouere videbatur ; Venio ad secundum.

Nominis Iansenij proscriptioni, & famæ, ac fidei illius detractioni assentiri non vis ; cum de illius hæresi tibi non constet. Verùm cum huius proscriptionis author non sis, sed ei tantum consentire timeas, nonne tuæ ipsius famæ tuæque fidei integritas tibi maiori curæ esse debet quàm Iansenij ? Atqui dum Iansenio times, infamiam, quam ab eo auertere non potes, tibi infligi pateris, periclitatur propter tuam inobedientiam tua fides, tuique nominis existimatio : malum, inquam, quod à Iansenio repellere non potes, in caput tuum imprudens accerfis. hîc tritum effatum inuertendum, quod alteri fieri non vis, tibi ne feceris. Diuelli à Iansenio non vis, separari à summo Pontifice, ab Episcopis Ecclesiæ, à Fratribus, à communione fidelium pro nihilo ducis. Sed ais, si ab Ecclesia eiicior, modò sine culpa sim, non nocebit. Quamquam in culpâ non esses, graue istud malum est ; & omni ratione vitandum : satius esset mori quam hoc incommodum incurrere. Sed quis tibi dixit te in culpa non esse, cum contrarium affirmant plerique omnes Episcopi, Doctores Theologi, summus ipse Pontifex ? Tuo hac in re adhuc vteris iudicio, quod fallax & lubricum, & erroribus multis obnoxium. Quam multi olim Origeni valde addicti fuere, ijque viri magni ? & tamen cùm autoritate Ecclesiæ ipsi renuntiandum fuit, non reluctati sunt. assensere eius nominis proscriptioni, & memoriam illius alioqui celeberrimam damnari passi sunt. Intererat enim totius Ecclesiæ tunc, vt tantum nomen labefactaretur, ne alijs esset laqueo, ne Catholicos in perniciosissimos errores, quibus libri eius scatebant, induceret : & tamen an ipse tot errorum author esset dubitatum est : & non defuere, qui eum defenderent, quique ab alijs, operibus eius insertos, aut falsò

ei tributos sustinerent. Consensere tamen omnes, vt errores Origeniani dicerentur, & tamquam Origeniani damnarentur. Sic hæresis Nicolaitarum ab authore de quo non constat nominata, & eius nomine damnata est. Qui condemnationi Theodoretī propter authoritatem Concilij V. assensere, an idcirco apud posteros male audierunt? aut in crimen propterea vocati sunt? ita certè qui hodie Ecclesiæ vnitatem, Superioribus obedientiam, propriæ sententiæ abdicationem, Fratrum concordiam Iansenij gloriæ præuerterint, & quam tueri non possunt eius nominis existimationem, missam fecerint, putas reprehendendi sunt, aut in crimen aliquando vocandi? sudarunt aliqui, vt hanc infamiam quæ nomini Iansenij inuritur, pro virili amolirentur, eumque ab omni calumniâ vindicarent, nec dubito quin bono animo laborauerint: sed quandoquidem eò peruenire nequiverunt, nihil ipsis antiquius esse debet, quàm vt Ecclesiæ cuius filij sunt sese approbent, eique sese adiungant. Qui diu arcem defendit contra hostes acerrimos, postquam strenui ducis partes omnes adimpleuit, vbi extrema videt diruta propugnacula & hostes iam arcem inuadentes sentit, si omni spe salutis ablatâ componit, quò saluus esse queat, nequaquam id ei dedecori est. Vt enim fortis in defendenda arce, sic prudens in turandâ suâ vitâ habebitur. Nihil superest Iansenij defensoribus præter distinctionem Iuris & Facti: at hoc est quod nobis postremò pertractandum est.

Vtinam distinctio illa numquam in mentem Iansenistarum venisset, plus incommodi affert quam vtilitatis: Nam diu in Ecclesia fuit subscriptum hæreticorū condemnationi absque ullâ iuris & facti distinctione, vt in Ariana, Nestorianâ, & Eutichianâ hæresi numquam venit in mentem cuiusquam factum à iure secernere. Ita sane (inquis) quia Nestorium authorem esse illius hæresis euidens erat; nec ipse negabat, ynde necessaria non fuit illa distinctio. Hæc responsio huic loco non congruit. Fateor dubitarum Fuisse an quinque Propositiones ab INNOCENTIO X. damnatæ essent Iansenij: numquam dubitarum est an Nestoriana hæresis esset Nestorij, & sic de alijs: verum hac de dubitatione dixi in prima

parte huius Epistolæ, magis hac in re credendum esse Patri-
bus Ecclesiæ affirmantibus quod sint Iansenij, quàm paucis
Doctoribus qui hoc negant. Itaq; exceptio illa non est huius
loci: Si enim in prima parte euici hoc, quod mihi erat in men-
te, concedemus Propositiones esse Iansenij. Sed hoc quod
dico esse Iansenij, Facti non Iuris res est (inquis) fateor:
at Factum numquam ad fidem pertinet. Distinguo, præci-
sum, esto, coniunctum cum iure, nego: nam ab antiquis in
refutatione hærescon Arianæ, Nestorianæ, Eutychianæ, &
quod rem nostram propius spectat, Nicolaitarum, & Orige-
nianæ, Factum à Iure numquam præcisum fuit. Vtrumque
damnatum est. Propterea dixi, qui hanc distinctionem præ-
tendunt, sibi ipsi molestiam facessunt. Factum cum Iure
coniunctum simul confundere, vtrique subscribere vnâ sub-
scriptione neque insolens in Ecclesia, neque absurdum, imo
sæpissime vñtatum fuit, neque veniebat in mentem ista di-
stinguere. Tribus à me propositis existimo me fecisse satis.

Non retexo hîc iteratas Iansenianorum querelas, inaudi-
tos damnari, rem inter partes minimè agitatam definiri, in
toto huius Condemnationis progressu multa ommissa quæ ne-
cessaria erant, multa perperam sumpta, aliaque huiusmodi
innumerabilia. Hæc si quidem, antequam res confecta esset
opponi potuere, nunc finem hisce disputationibus imposuere
Episcopi. Frustra illa dicuntur, neque censenda sunt, nisi
inania peruiaciæ cuiusdam velamenta aut vltima despera-
torum perfugia. Neque mihi placet quod nonnulli subscri-
bendo Clausulas quasdam, aut Exceptiones apponunt, qui-
bus ab omni calumnia tueri sese possint: Ne scilicet ipsis
ignauiam vllus exprobet; quâ in re non satis sincerè agere
videntur, & aduersariis suis scribendi agendique contra se
ansam præbent, nolunt has sopire lites, & nouarum disputa-
tionum semina post se relinquunt, in quibus tamen, si ex-
præteritis futura bene conijcimus, egregiè vapulabunt. Sim-
plici Subscriptione hac in causa nihil melius, nihil tutius sub-
scribenti esse possit.

- Scio quid mihi obijcias me nempe nondum huic Formulæ
Episcoporum subscripsisse. Aio in primis Formulam Episco-

porum Parisiis anno 1660. Congregatorum non aliam esse ab illa quæ ab Episcopis Parisiis anno 1655. Congregatis dictata fuit: huic autem cum Religiosis sanctæ Genouefæ Canonicis dudum subscripsi. Postremæ huic subscribere non detrecto; sed nemo qui id iuris habeat, id à me postulavit, & norunt omnes ex Episcoporum decreto, & Regis edicto, petente proprio loci Episcopo, esse subscribendum. Si Rex ipse, si Superior quivis id à me exigat, præsto sum. Subscribo. Vale, & si mihi credis, suscribe.

Datum die quarta Octobris, Anno Domini 1661.

